



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

3. Kalenderwoche – ab 17. Januar 2009

Am Brangor

Es dud ja weriglich Leide gähm off dor Weld, die kenn eim eschd leid dun. In dor driddn Weld, wennse hungorn missn odor Durschd hamm odor sisch geschneidisch abschlachdn fiehr irschendeen Schdammesfirschn... odor ooch hierzulande... so Leide die arbeitslos sinn odor die kee Geld hamm odor die krank sinn odor doof... - abor jezde grade in dor Windorzeit da dud misch eene Sorde von bedauornswerde Leide reschleschd zu Drähnen riehorn, da dud mei Härz vor Midleid bähm, wenn isch die sähn du - de Roochor!

Da dun se ofd bibbornd vor Kälde vor Kneibn un Gasdschädndn schdehn, wen die keen "Schmoog Ruhm" ham un ziehn hasdisch eene Zigredde in de Lunge nein. De Jagge odor dähn Mandl hammse ja vor Gier in dor Kneibe drinne häng lassn - schnell naus, de Lunge bfiedschd!

Nu dud abor ehm das Roochn eenor Zigredde doch e bißl längor dauorn, als wie e eenfaches Oberhemde geschn zähn Grad Minus schidzn dud. Also, wird de zweede Hälfte von dor Zigredde geziddord wie Esbnelaub. De Gluhd dud ja ooch heeschdens de Hände bißl warm haldn. Wennse in kleen Rudln vor dor Kneibe schdehn, dann dun se sisch ofd wie de Schafe so ganz dischd zusammdrängeln, um sisch geschneidisch e bißl Wärme zu schenkn. Nee, so e dambfendes, ziddorndes Rudl von Roochor kann eim weriglich zum Erbarmen riehorn.

Guhd, kennde mor jezde sachn, die kenndn ja ooch, wens ehm draußn so kald is, off de Zigredde vorzischdn! Das kennde mor sachn, wemmor kee geiebdor Roochor is! Abor wensde ma e geiebdor Roochor warsd, dann weeße, dass das ehm nisch rischdisch is. Un wens noch so kald is, ohne so e Lungendorbedo kannsde de näschsde halbe Schdunde nisch ieborlähm. Das is so wensde e Roochor bisd! Wenn de Suchd bieb machen dud, mussde se befriedischn!

Vorschärfd dud sisch de Siduadsjohn fiehr de Roochor allordings offm Haubdbahnhof darschdeln. Ma abgesähn dadervon, dass dord meisdens in ordendliche Glamoddn rumschdehn un reladief ziddorarm roochn dun... abor dord missn se sisch freiwillisch als Roochor an dähn Brangor schdelln. Un das machn die ooch werglisch alle ganz brav. Da dun die dord offm Bahnhof in dähm kleen Gefierd schdehn, was mid gelbe Linjen offm Bodn offgemald is, un dun dord drinne gesenkdn Bligges ihror Suchd frehnen. Ringsum offm Bahnhof is nischd los. Allor zwanzisch Medor ma e eenzlnor Reisendor... abor die fünf Roochor drängeln sisch in dor Roochorzone, weil ehm dord dor Aschebeschor is.

Nee, wenn isch misch da an meine eischenen agdiefn Jahre als Roochor orinnorn due... ob isch misch da so bereidwillisch erniedrischd ham däde... im Gefierd schdehn, eingebferschd, zur Warnung fiehr alle andorn... - guggd hähr, isch bin e Roochor!

Wenn meine Gudste e Roochor sein däde, also eene Roochorin! - die däde nisch kleen beigähm, die däde sisch midn in de Bahnhofshalle schdelln un Bfeife roochn. Das däd isch dähr zudraun!

Eduard Sachsenmeyer